



## *Drin de hum* 230

Qu'ey ço qui-t dit, à tu, lou hum leuyè qui puye,  
Tout doucines, en sus dou brancàtye qui 'stuye  
La tranquile maysou ?  
Arré, belhèu A you que-m dit mante ue cause,  
E quon l'oelh sus aquet hieu gris ou blu se-m pause,  
Que-m bièn ue cansou,

La cansou de la bite apatsade e balente,  
Au briu toustém pariè, doun arré n'entalente  
Lou biàtye benadit,  
E semble tiène quâsi 'n uournè de case  
Oun droum u nèn, au ras d'u bielh brucan la brase  
E d'u gat marfandit ;

Cansou dou froustilhous pressadot d'ue pelhe  
De daunete qui ba, qui bié coume l'abelhe  
Arroun de l'abelhè ;

Cansou dous grans esclops aus pès dou yoèn lauràsre  
Qui s'en tourne, lous oelhs plés d'espòer encantàyre  
Dou camp oun tribalhè.

Apuch, que sera la gauyou de l'ataulade,  
Daban l'escudelou de broye atucoulade  
Lou beroy debisa ;  
Au gasoulhis dou nèn mesclan sa bouts cantante  
La hemne au dous parla de soun òmi qu'encante  
Lous perpits de paysa.

.....  
Ah ! puye, hum leuyè, floc de las cheminèyes !  
Birouleye à plasé, danse à las esclarèyes  
De tausis e de bèrns,  
A l'ore oun cad la noeyt sus la terre qui-s care,  
Puye entau blanc troupèt de lugras qui-s desglare  
Cabén dous cèus ubèrts !